

no. 6

APOLOGIE

OV

RESPONSE

A LA CHRONIQUE

des Fauris.

M. DC. XXII.

APOLOGIE

OV

RESPONSE

A LA CHRONIQUE

des Fauteurs.

*duplicate*

*not cataloged*

M. DC. XXII



# APOLOGIE

O V

## R E S P O N S E

### A LA CHRONIQUE

des Fauoris. I y ad breui

Essieurs, c'estoit à bon-  
ne raison que la Loy  
**M** nommée *Remnia*, fut  
autrefois establie pour  
punir les calomnia-  
teurs, puis qu'elle faisoit remar-  
quer pour odieux & pour vrais pe-  
stes d'un Estat, ceux qui remplis  
de hayne & d'enuie, en despit des  
loix d'une bonne conscience, vou-  
loient tenir le party de la calomnie:  
Cette Loy fut comme vn prodige

A ij

en son establissement, à cause de la corruption du siecle qui estoit lors: Mais à present si nos Roys la faisoient executer, ce ne seroit plus vn prodige ny vn fantosme, elle ne donneroit plus d'estonnement aux hommes, & principalement à ceux qui portez d'une affection sincere au bien de l'Estat, n'en recherchent que le lustre & l'aggrandissement, ains ce leur seroit vn indicible contentement, & vne ioye nompareille: Car pour le iourd'huy les lettres & les sciences sont comme les forests aux voleurs, qui leur seruent d'ombre & de couverture pour executer les plus damnable desseins sous des pretextes specieux.

Cela s'est assez veu pratiquer pendant la Regence de la Reyne Mere, encores que sa prudence & son Conseil operassent beaucoup au bien public depuis la Maiorité du Roy: Quelle sedition n'a-on point voulu faire naistre par des escripts & libelles diffamatoires contre les per-



5  
sonnes plus affidées de sa Majesté, & pour l'autoriser d'une cause iuste, quels moyens n'a-on point inuenté, premierement pour rendre odieux deffunct Monsieur de Luynes, & le faire trouuer au Roy indigne d'estre éclairé des rayons de sa faueur: On a vomy des plaintes contre luy, & des accusations si esloignées d'apparence & de raison, que iamais on n'a sçeu trouuer moyen d'en prouuer aucune, ny par consequent de le conuaincre de tels faicts calomnieux: Tellement que ce dessein n'estant porté que d'une audace de vouloir brider la volonté du Roy: il a ressemblé à ces grands tonnerres qui semblent par leurs grandeurs pouuoir tout rompre, & neantmoins ne peuvent offencer.

Et pour considerer sans passion que tout ce qui s'est escript contre la personne de ce deffunct, faict au commencement de sa fortune, qu'au milieu de son plus grand heur, n'estoit qu'une intention proposée de

le calomnier à quelque prix que ce fut, pour paruenir s'il eust esté possible à le debusquer des bonnes graces du Roy. C'est qu'apres que l'on a discouru de son extraction assez impudemment, & que l'on a recogneu que sa Majesté ne tenoit compte de telles fornettes, comme incapables de luy destourner ses volontez. L'on s'est seruy pour mieux calomnier ses déportemens & ses veilles continuelles à l'aggrandissement de son Estat, du nom d'un pauvre Hermite solitaire, sous ses meditations duquel l'on n'a pas manqué d'introduire des accusations plus violentes contre sa personne que iamaïs on n'auoit faict, imitant en cela les malades detenus d'une fièvre chaude, lesquels ne pouuans trouuer remede en leurs imaginations de cette chaleur trop esmeus, entrent d'ordinaire en des ardeurs plus violentes, d'où la rage prend naissance, qui escumant comme incensé, veut & se force d'effectuer

ce que la raison ne pourroit iamaïs permettre.

Voilà en effect ce qui a faict descrire les escriuains du siecle, contre ce deffunct Duc de Luynes, fait Conneſtable pour le Roy avec plusieurs prudentes & discrettes considerations, & m'asseure qu'outre l'enuie ou la mauuaise volonté, il ne se peut trouuer homme qui oze soustenir que iamaïs il ait desiré de s'aggrandir au dettriment d'autrui, quelque bien veillance qu'il ait peu recognoistre de sa Majesté, si bien qu'à tort l'Autheur du libelle intitulé la Chronique des Fauoris, se despoüille du manteau de la raison, pour se reuestir de celuy de la calomnie. Puis que chacun ſçait que le deffunct Conneſtable n'a point tant conſeillé le Roy à la guerre contre les Rebelles Huguenots, que son mouuement propre & la iustice de sa cause, l'induiſoit dès vn long-temps. Quoy que ce soit, croyant que luy seul a esté l'Autheur de cet.



te guerre, demeurant d'accord en general que sans luy la France eust esté longuement pacifique, & que tout ce qu'il en a fait n'a esté que pour s'esleuer (ainsi que le Chroniqueur nous propose.) A la verité il y auroit grande apparence en ce discours si toutes choses se prenoient & se debuoient prendre au pied de la lettre, car ayant esté faict Duc, n'estoit-ce pas son debvoir de rechercher des moyens pour recompenser par ses seruices celuy qui le faisoit si grand, quoy? donne-on des prix sans peine? des recompenses sans travail? des Lauriers sans iamais auoir obtenu de victoires, ou bien si l'on vse de ces faueurs enuers qui que ce soit, n'est-ce pas pour l'animer & l'induire à la recherche d'une parfaicte recognoissance. Aussi le sieur de Luynes se voyant tant fauorisé du Roy, & ne pouuant de quelle sorte recognoistre tant de biensfaicts, il proposa sagement à sa Majesté, que si iamais les occasions



occasions de la seruir se presentoiēt,  
 qu'il aymeroit mieux perir dans  
 toutes sortes de perils que de gau-  
 chir à ce que sa conscience l'obli-  
 geoit. Et ce fut sur ces entrefaictes  
 que le Roy sceut la coniuration des  
 Rochelois & de leurs adherans. A  
 ce moyen de laquelle en ayant pris  
 l'adujs de son Conseil, il fut trou-  
 ué bon de leur faire la guerre si d'a-  
 uenture ils ne flechissoient à leurs  
 insolentes propositions, estant vn  
 poinct tellement preiudiciable à la  
 Couronne, que si telles entreprises  
 se fomentoient dauantage, ce pour-  
 roit estre en perte la totale submer-  
 sion del'Estat, en quoy ils auoiēt gran-  
 de esperance, estans d'vn costé saisis  
 des plus fortes villes du Royaume,  
 & de l'autre armee, & reuestus d'vne  
 effrontée desobeyssance.

Si donc ledict sieur a faict des pro-  
 testations au Roy de le bien seruir,  
 apres que sa Maiesté l'eust honoré  
 de la Couronne Ducale, & que du

depuis les occasions luy ayent esté si fauorables qu'il soit parueniu au grade & au rang de Connestable, Faut-il pour cela qu'il en soit blasme ? sera-il dict que son bonheur & la volonté d'un Roy sage, iuste & prudent, puissent faire tort à sa memoire, est-ce vn subiect de deschirer en pieces sa renommee, & l'appeller deschireur & pipeur de Royaume ? Non non cassandres, charlattans, escriuains de ce siecle, s'il a suiuy le Roy en son voyage de la Guyenne, & de Languedoc, & que par tout ce pays il ait vsé des priuileges concedes à sa qualité, pour cela il n'en a pas esté moindre seruiteur à son Maistre, pour cela sa conscience n'en a pas esté offencee: quiconque est honoré d'une charge, doit prudemment conseruer son rang, & luy faire aussi recognoistre que leur intention de bien-faicteur le requierent & le desirent, estans tres-vtile de considerer ce

qui est passé au respect du present & del'aduenir, qui ne sont que reflux & reflux de temps, qui permettent les diuersitez & changemens, aussi bien que la varieté des saisons.

Donques la guerre n'a point esté causée par deffunct Monsieur, le Connestable, affin de s'agrandir de plus en plus, mais bien est vray que s'inclinant aux desseins du Roy, il a voulu suiure les hazards tels que la necessité a peu requerir, non en qualité de simple soldat, comme aucuns mal-aduisez soustiennent qu'il debuoit faire, mais en qualité de Connestable, fidels conseils de sa Maiesté, qui recherchoit la Paix parmy la guerre, & dans vne paix feinte & simulee vne guerre toute sanglante, pour s'en tirer vne paix toutetranquile: Et que la mesdisance semble crayonner deuant les yeux de sa renommee, que le Conseil du Roy auparavant le voyage estoit basti de ses



creatures , au nombre desquelles estoient Messieurs l'Archeuesque de Sens & le Garde des Sceaux , à qui pour adherer à ceste beliqueuse entreprise estoit promis des chapeaux rouges , si est-ce que le corps est tousiours plus fort que son ombre, & la verité plus iudicieuse que ne peut estre le mensonge : C'est à dire que le Roy n'estoit pas si peu aduisé dans ses affections , qu'il ne iugeast bien de son estoc l'importance de son entreprise , & quel danger il pouuoit courir faisant la guerre contre ses subiects , si bien que d'en donner l'honneur & le deshonneur tout ensemble à deffunct Monsieur le Connestable , & de le faire Auteur , executeur, & conquesteur de ce qui s'est fait.

Il n'y a non plus d'apparence & c'est aussi mal à propos que celui qui ietteroit ses bleds dedans la mer , esperans d'en retirer des fruits cōme d'une terre bien fertile , non que ie vueille dire



qu'il n'eust assez de courage pour monstrier des effects en cas de necessité, mais imputant à luy seul les effects de la guerre c'est en le blasmant blasmer le Roy & le tenir pour ignorant en ses affaires, ce qu'à bōds & à volees l'Autheur de la Chronique s'efforce de faire, mettant bas toute sorte de respect, pour satisfaire à son humeur vindicative ou poussee d'un faux Demon enragé, contre le Roy & contre ses plus fidelles seruiteurs.

Et de faict discernant de ce qui s'est faict au voyage par toutes les places soubçonnees & recognuës pour estre rebelles à sa Maiesté, l'impudence le porte d'attribuer toutes les executions, les exploicts de guerre à Monsieur le Connestable seul, comme si le Roy eust esté encores dans un maillot, & que ses victoires ne dépendissent que de luy, le tout affin de le rendre odieux enuers le peuple, qui

presque porté dans le desespoir  
croyoit que c'estoit luy qui faisoit  
la guerre, & non le Roy.

Non content de toutes ces calomnies, il met en ieu le Pere Arnoux pour le faire croire instrumēt de la guerre & de la caballe prétendue, & passant plus outre, ne pouvant plus que dire, sans s'esgarer il s'attaque à Messieurs de Branté & Cadnet, dont les actions ne peuvent rougir pour auoir participé aux entreprises supposees telles que le Chroniqueur met en auant aussi en vain les passe-il soubz silence, se contentant de parler de leurs pannes, qui n'estant rien & ne pouvant rien pour l'Estat, faut voir que cest escriuain est un frenetique qui ne sçait que les ombres de ses imaginations. Ce qui ce peut iustifier par la suite de son discours en maints & diuers endroits, tantost introduisant en ce monde, & en l'autre le feu Roy que Dieu absol-

ue, tantost ses vieux & anciens serui-  
 teurs, tantost vn Courrier partant  
 de la Cour, tantost vn Carrabin de-  
 stourné de l'armee, lesquels il fait  
 parler à sa mode de ce qui auoit esté  
 dit assez de fois, & sans besoin, pour-  
 suiuant par ainsi ses accusations & ses  
 contumilies contre deffunct Mon-  
 sieur le Connestable, & Messieurs  
 ses freres, lesquels quoy qu'aggran-  
 dis par la faueur du Roy ne s'en esti-  
 ment dauantage, ains se comportent  
 dans vne modestie assez louïable,  
 pour le rāg & la qualité dont ils sont  
 honorez.

Au reste, ie ne les pourrois da-  
 uantage offencer, c'est l'accusation  
 contr'eux formee d'auoir retenu les  
 deniers du Roy au lieu de les distri-  
 buer aux soldats, ainsi qu'il estoit  
 ordonné, & de vray ce fait estant  
 prouué, seroit res-suffisant de les  
 rendre blasmbables & punissables  
 tout ensemble. Mais quoy? qui est-  
 ce qui forme ceste plainte c'est vn



simple particulier qui n'ose se nommer en ses escrits, non plus qu'un voleur en ses actions, & qui ne vomit ces friuoles plaintes que afin de semer du discord & de la disgrâce, pour par ce moyē faire entrer quel qu'un en rang, à qui possible l'enuie de bien voler le Roy tient dès que sa Maiesté fit eslection du seruice de deffunct Monsieur le Connestable. Quoy que ce soit ce n'est point vne plainte publique, ains quelque ialousie, comme j'ay dit, de voir ces Messieurs aupres du Roy, qui comme clairs-voyans au bien public, & à la conseruation de la Couronne ont preueu tous les mal-heurs qui nous talonnent par la malice & la desobeysance de nos aduersaires, & par ceste preuoyance ont assisté sa Maiesté de leur conseil: en sorte que ces rebellions en partie sont amoindries, & le surplus en branle de faire ioug au deuoir & à l'obeyssance.

clairvoyans



Clair voyant ouy , ie les nomme , non sans iuste raison , & sans apparence: & quand ie dirois que ce sont de vrais Argus , ie ne croirois fouler ma conscience, ny seulement esmouuoir sa rasche de flatteur , si ce n'est de la part de leurs mal-veillans, & de leurs complices, qui comme Hydres demeurantes, recherchent les moyens de deliurer ce qui est de plus Sacro-sainct en leurs actions : He quoy: le Roy est il sans veux, & sans iugement, pour se laisser tromper ainsi que l'on dit, qu'il a fait par ces Messieurs, ses oreilles sont elles charmez, pour ne pouuoir s'exempter d'un chant fraduleux de Syrenes, bref la raison est elle retenuë par quelque frain, pour se desponiller de son autorité, afin d'en reuestir des seruiteurs de son Estat : Non, non, langues venimeuses & pestiferes, le regime & le gouuernement de ses affaires est dans un ordre si parfait, qu'aucc le temps toutes choses reussiront

au commun contentement de ceux qui ne cherchent que la paix, le tout malgré & en despit de vos ames depravees, qui comme simples frelons viendront à neant à la lueur de ceste nouvelle prosperité.

He! croyez vous que les victoires cy deuant obtenüe, tant à la confusion des Habitans de Saint Iean d'angelly, que de ceux de Clerac, Nerac, Bergerac, & Montauban, diminuent l'autorité du Roy, & rendent Monsieur le Connestable & ses freres plus avant dans la fortune, de deux choses l'une, ou falloit prendre de la sorte contre les rebelles, ou falloit les laisser abuser de leur orgueil, daissant l'un, c'estoit s'amoindrir, empeschant l'autre, c'estoit s'agrandir, tous deux sont executez, c'est pourquoy au lieu d'avoir heurté l'autorité Royale, elle paroist avec plus d'esclat, & au lieu qu'on ne tenoit le Roy, que pour un Roy iuste, maintenant on le dir, iuste & victorieux, & vray imitateur des

actions heroyques de ses predecesseurs.

C'est pourtant vn grand malheur à la France d'estre ainsi brouillée au preiudice des Edicts du feu Roy Henry le Grand, (ie dict le maistre de la Cronique,) & puis cet affaire ayant esté confirmée par les aduis des Peres de la societé, il y à apparence que c'est vn conseil tres-pernicieux, puis qu'ils quittent leurs pays & leurs parens, pour l'accomplissement de leurs desirs. Voila vne grande plainte à ce coup icy, parlé d'auoir rompu des Edicts, & voyez, on dict que ce s'ont les Iesuistes qui en sont les auteurs, lesquels comme Commissaires du Truc pourueu qu'ils effernent leurs pretentions, ils n'ont soucy du reste, cōme si ces Peres recherchoient les bonnes graces du Roy, pendant vn temps agité de tenebres de la guerre, pour paruenir à quelque degré plus haut que leur profession.

Passons outre, ils ne sont pas seuls

qui ont leur lardon, il ny à pas iusques au Saint Pere qui ne soit de la Caballe & du party, le Roy d'Espagne adhere à ces desseins, & n'attend que les occasions de se servir des éuenemens & le tout (selon nostre calomniateur,) pour se mocquer de nous qui sômes duppes. duppés par ces Messieurs les Oyselleurs, le Marquis de Spinola n'a pas esté oublié dans ceste belle & difamante Croeique, bref il ny à sainteté, ny autre Seigneurie, quoy qu'elle soit fort affectionnée au bien, & au seruice du Roy, qui ne recoiue du reproche par ceste plume medisante, & qui n'encoure si ces intentions reussissent le blasme plus indigne, par le plus ignominieux qui ait iamais esté remarqué en la personne du plus infame de la terre.

Mais quoy? ainsi qu'il est permis à la chauue soury de degoiser au leuer des tenebres, & aux Chas huans ou Hibous, de faire leurs cris pendant ce temps, de mesme aux Calomniateurs



& mesdisans il e st presque permis de tout dire, voire d'introduire vn mensonge pour verité, pourueu que le temps soit obscurcy des confusions d'vne reuolte, & que ceste reuolte luy serue d'occasion pour l'ascher la bride à toute sorte de licences. Ce qu'assez à propos ont faict Messieurs les escriuains, pour s'exempter des peines par eux meritées. Car quelque plainte qu'ils ayent peu vomir à l'encontre de Monsieur le Connestable & de ses freres, mesmes auparauant qu'il fut esleué en ceste dignité, ils se sont seruy de pretextes à les considerables ombrages portant des tenebres de l'impoliture, & ne donnans d'autre l'vstre à leurs pretexte, que le trouble de la mauuaise fortune de nos Princes, à laquelle neantmoins ils n'ont iamais consenty ny adheré, ains se voyans fauorisé du Roy, ont faict en sorte par leurs tres-humbles supplications d'obtenir la liberté de Monsieur le Prince, sans d'autre esperance

que le bon heur de ses bonnes graces.  
 Ce que le plus grossier peut à present  
 recognoistre veu les deportemens qui  
 se sont faits du depuis en Cour, estant  
 vray semblable que si mon dit sieur le  
 Prince n'auoit obtenu sa liberté du  
 Roy, que par la seule entremise de  
 Monsieur de Luynes, & sous quel-  
 que condition reserüee lors de sa ca-  
 ptiuité, Maintenant qu'il possède du  
 tout le Roy, & que la Majesté le che-  
 rit entierement, ne seroit ce pas vn  
 moyen de donner lieu au souuenir, &  
 de manier ces Messieurs à baguette,  
 s'il faut ainsi dire: Car les Princes sont  
 tousiours priuees, & quoy que les  
 Roys destournent d'eux pour vn  
 temps leur bien veillance, si est-ce que  
 l'esloignement n'en est pas si reculé  
 qu'il faille que des tiers croyent l'obli-  
 ger s'ils s'entremettent pour leur ser-  
 uice. Aussi n'ot il esté peut estre si peu  
 prudens, que de faire des propositions  
 de raisonner, ains toutes les fois qu'ils  
 ont esté le visiter, ce n'a esté qu'en in-

tion de luy faire recognoistre  
l'honneur, le respect, & l'affection  
qu'ils auoient protesté à sa grandeur.

Neantmoins ces louables actions  
sont mises au mespris de quelques vns  
& pour d'auantage les tenir on leur  
oppose leur fortune, qui ne peuuent  
estre se dict on en quatre années, si es-  
leuée sans auoir volé le Roy, & sous  
mis presque tout le Royaume en leur  
obeissance, ne considerant pas ny ne  
desirant de considerer que quiconque  
s'approche du Soleil est d'ordinaire  
fort esclairé, & qui s'efforce d'obtenir  
la grace, ne peut qu'il ne s'agrandisse  
beaucoup. ainsi que le petit Dauid, qui  
de petit Berger qu'il estoit de sa vaca-  
tion, paruint à la dignité Royale, non  
point par des voyes illicites, mais par  
vne eslection faicte de l'esprit de Dieu  
qui iugeoit pouuoit vn iour estre  
bien seruy de ce personnage.

Monsieur de Luynes est paruenue de-  
puis quatre ans il est veritable, de-  
puis ce temps, Messieurs ses freres sca-

uent que c'est de la faueur du Roy.  
 Mais comment ce bon-heur leur est-il  
 arriué, la calomnie dict que c'est par  
 des enchantemens desquels ils se sont  
 seruis, par l'industrie de Boisgaudry,  
 pour saisir & captiuer l'esprit du Roy,  
 au moyen desquels ils ont faict croire  
 à sa Majesté que le blanc estoit noir, &  
 que tout ce que ses meilleurs serui-  
 teurs deliberoient pour son seruice,  
 n'estoit que des entreprises contre sa  
 personne, si bien que leurs proposi-  
 tions reussissent en despit de tous, ça  
 esté la cause de leur fortune ce qui le  
 dict assez impudemment, sans auoir  
 esgard que le Roy se peut ressentir de  
 telles impostures & faulxetez, non  
 tant pour l'interest de ces Messieurs  
 que l'ou nomme Favoris, que pour le  
 sien particulier qui est tellement en-  
 gagé en ses medisances que c'est se  
 reputer pour incensé.

Toutes choses ont leur temps & leur  
 saison, & sommes contraincts par la  
 raison de ceder aux loix de l'Amour,  
 disoit



disoit vn Poëte, les bons François le iugētbien, aussi ne font ils aucunemēt d'estat de ces sornettes de discours, que les pilotes plus rusez des simples vents qui s'esleuent sur la mer: car l'amour de l'affection qu'ils portent à leur Prince, ne pouuant receuoir de blesseure ny d'offence, ce leur est vn Azile tellement assleuré, que tout ce qui se diēt ne leur est qu'vn fresle vêt, tout ce qui se propose qu'vne fumée, de tout ce qui se machine par les astuces de la ialousie, rien qu'vne bluette de peu d'effect, capable destre destruicte & renuersée par le moindre esclair d'vne puissance superieuse.

On me dira qu'on ne parle poinct contre le Roy, ny qu'il ny a pas vn de ceux qui ont escrit contre Messieurs de la faueur, qui en ait eu quelque dessein, leur intention s'estant tousiours reseruee les loix du respect & de l'amour que l'ô doibt à son Prince: mais quel amour, quel respect, quelle obeissance, car on peut dire d'eux de la fa-

çon, & sur les particularitez des affaires presentes, on parle absolument du Roy, & en les offénçant comme l'on faict, l'on offence aussi sa Majesté, non que la relation soit ainsi que celle du pere au fils, ny du fils au pere, mais à cause de la guerre entreprise contre les Huguenots par sadicte Majesté, qu'il semble aux médisans estre de l'inuétion seule de ces Messieurs, pour compagnonner avec le Roy, & pour tirer recompense de leurs seruices & de leurs conseils iusques à s'emparer du Diademe.

Ces belles propositions se voyent au naïf representez dans ce tableau à double visage, de la Cronique des Fauris, & apres que toutes sortes d'impostures & de faulsetés sont amplement exagerées contre la renommée de deffunct Monsieur le Connestable on ne sçait plus que luy reprocher sinon qu'il estoit bon Chancelier en temps de guerre, & braue Connestable en temps de paix, voulant par là

signifier que son ame estoit si pusillanime, & si reuestuë d'ambition qu'il vouloit acquerir l'honneur des combats en se reposant, & ne rien combattre pendant ses hazards de la guerre que la mort, au moyen de ce qu'il preferoit à sa charge de Connestable le plus doux repos qui soit à la Cour. A quoy l'on peut facilement respondre, & avec vne verité toute apparente, qu'il ne luy estoit mal seant de garder soigneusement pardeuant luy les Seaux de France, apres la mort de Monsieur du Vair, puis que le Roy luy auoit absolument commandé de ne s'en point defaizir qu'il n'eust faict eslite d'un homme de bien à qui il en donnaist la charge & le soing : ains en cela doit auoir acquis le tiltre de bõ & fidele seruiteur, n'en ayât d'autre part iamais abuzé, ny faict acte soubs le benefice d'iceux, qui puisse faire rougir sa memoire, & porter de l'infamie à ceux qui soustiẽdront à iuste cause sõ party. Voila beaucoup de faicts mis en auant non prouuez, mais supposez,



voila grand nombre d'accusations  
 cōtre la personne d'un deffunct, & de  
 ses freres, mais non pas des conui-  
 ctions on les tient pour pipeurs du  
 Royaume, pour viceroy & controo-  
 leurs de l'Estat, pour subornemēs des  
 bonnes & saintes volontez du Roy,  
 pour des Phaëtons qui veulent regir  
 à quelque prix que ce soit l'Empire  
 François, pour auoir conspiré & pro-  
 curé deuant Clerac, la mort du Baron  
 de Thermes, & deuant Montauban  
 celle de monsieur le Duc de Mayēne,  
 bref pour auoir induit le Roy à faire  
 la guerre, afin de l'engager dans le ha-  
 zard, avec Monsieur son frere, pour  
 venir à bout par ce moyē de ce qu'ilz  
 auoient premedité; voila les pacquets  
 qu'on leur adresse, lesquels n'estant  
 scelees ny cachetees, que du seau  
 d'une enuie toute manifeste, & d'une  
 calomnie toute punissable, n'empes-  
 cheront de saisir les Esprits de Mes-  
 sieurs de Brāthe & Cadenet, pour re-  
 mōstrer à ces mesdisans que tousiours

*Gaudet patientia duris,  
 Lætror est, quoties magno sibi con-  
 stat honestatum.*

Et puis ce n'est pas d'eux seulemēt que cest impudent Chroniqueur s'est mocqué par ses escrits, il s'adresse aussi aux Princes & aux Prestres, & comme a esté dit cy dessus à la personne mesme du saint Pere, pour auoir eu des intelligēces avec deffunct Monsieur le Connestable au preiudice du droict du Roy, chose qui ne iustifie que par fausses couleurs seulement, & non pas par des apparences manifestes à ceux qui ont en main la direction des affaires de sa Majesté, qui est vne raison sur laquelle on doit asseoir vn iugement ferme & solide, estant tres-certain que telles entreprises ne se peuuent faire en vn Royau-me, qu'il n'en apparaisse quelque esclat.

Sur ce point ie finiray la presente rëponce, en attēdant que l'Autheur de la Chronique, prouue par viues

raisons les faits par luy allegués contre deffun& Monsieur le Conneſtable & Meſſieurs ſes freres , auquel cas, pourueu qu'il aduouè ſes eſcrits, ie promets de luy reſpōdre plus ample- ment, & de luy iuſtifier que ç'à eſté la paſſiō qui l'a fait eſcrire, ou bien qu'il a ſeruy de Miniſtre à la frenetique fa- ueur de quelque enuieux.

**FIN.**





















